

Droichead Treoir mhearthagartha

Beartas na Comhairle Múinteoireachta
maidir le samhail nua ionductúcháin
agus phromhaidh



An Chomhairle Mhúinteoireachta
The Teaching Council

Réamheolas ar *Droichead*

Is samhail nua ionduchtúcháin agus phromhaidh do mhúinteoirí nua-cháilithe (MNCanna) é *Droichead*. Forbraíodh beartas na Comhairle maidir leis an tsamhail nua seo tar éis próiseas comhairliúcháin a reáchtáladh sa bhliain 2013.

Tá sé mar aidhm ag *Droichead* a chinntiú go gcuireann comhghairmithe fáilte roimh MNCanna, ar shlí chórasach, le linn dóibh tosú amach sa ghairm is tábhachtaí sa tsochaí. Baineann sé leis an tréimhse sin de chleachtadh gairmiúil tacaithe a bhíonn ag MNC tar éis dó nó di clárú den chéad uair.

Déantar múinteoirí nua a chlárú faoi réir an choinníll gur gá dóibh páirt shásúil a ghlacadh in *Droichead* agus gur gá dóibh Clár Náisiúnta na gCeardlann Ionduchtúcháin a chríochnú. Measfar tréimhse phromhaidh múinteoirí a bheith thart agus déanfar iad a chlárú go hiomlán nuair a gheobhaidh an Chomhairle fianaise gur comhlíonadh na coinníollacha clárúcháin.

Ní mór *Droichead* a chríochnú laistigh de thrí bliana ó dháta an chéad chlárúcháin. Tá eisceachtaí ann; féach *Nósanna Imeachta le haghaidh Ionduchtúcháin agus Nósanna Imeachta agus Critéir le haghaidh Promhaidh 2014/2015* de chuid na Comhairle le haghaidh tuilleadh faisnéise.

Droichead i gcleachtas

Is í rialáil faoi stiúir gairmithe an bunluach a chuireann bonn agus taca faoi *Droichead*. Is léir sin ón tuiscint gurb iad na múinteoirí atá cláraithe go hiomlán na daoine is fearr chun tacú le múinteoirí nua-cháilithe atá ag iarraidh clárú iomlán a bhaint amach. Ina theannta sin, is é nó í comhghleacaí nó is iad comhghleacaithe ag a bhfuil taithí a dhearbhaíonn don Chomhairle Mhúinteoireachta cibé acu atá *Droichead* tugtha chun críche go sásúil ag an múinteoir nó nach bhfuil.

Dá bhrí sin, is é aidhm phróiseas *Droichead* cur ar chumas na gairme próiseas tacaíochta gairmiúla dá cuid féin a threorú ar shlí a chinntíonn go gcloítear leis na caighdeáin is airde agus go mbíonn muinín ag an bpobal as an ngairm i gcónaí.

Féadfaidh scoileanna *Droichead* a éascú ar bhealaí éagsúla, ag féachaint dá méid, dá struchtúr agus do na himthosca ar leith lena mbaineann. Iarrtar ar gach scoil a chinntiú go gcuirtear eispéireas struchtúrtha ar fáil don mhúinteoir nua agus go mbíonn tacaíocht ar fáil.

Dar leis an gComhairle, is é an cur chuige is fearr Foirne Tacaíochta Gairmiúla a bhunú. Bíonn príomhoide, meantóir agus comhghleacaí amháin nó níos mó ag a bhfuil taithí ar na foirne sin de ghnáth. Is struchtúr an-solúbtha é, áfach, agus oirfidh samhla éagsúla do scoileanna éagsúla. Tacaíonn meantóirí leis an múinteoir nua-cháilithe le linn phróiseas *Droichead*. Iarrtar ar an bpríomhoide agus/nó ar an gcomhghleacaí/na comhghleacaithe ag a bhfuil taithí a dhearbhu don Chomhairle go bhfuil an próiseas tugtha chun críche ag an múinteoir ar bhealach sásúil.

Féadfaidh múinteoirí ó roinnt scoileanna éagsúla a bheith ar aon Fhoireann Tacaíochta Gairmiúla amháin in imthosca áirithe. In imthosca eile, féadfaidh príomhoide nó leas-phríomhoide, nó comhghleacaí ag a bhfuil taithí a bheidh ainmnithe aige nó aici, a dhearbhu gur glacadh páirt shásúil in *Droichead*. Fágann sé sin go bhfuil sé de rogha ag príomhoidí páirt dhíreach a ghlacadh sa phróiseas dearbhaithe nó gan páirt dhíreach a ghlacadh ann.

Comhlánaítear foirm *Droichead* chun a dhearbhu go bhfuil an próiseas tugtha chun críche go sásúil ag múinteoir. Dearbhaítear san fhoirm sin gur éirigh leis an múinteoir:

- tréimhse íosta éigeantach de chleachtadh gairmiúil a thabhairt chun críche;
- páirt a ghlacadh sna gníomhaíochtaí ionductúcháin scoilbhunaithe, arna mbunú ag an gComhairle Mhúinteoireachta, ar bhealach gairmiúil;
- a léiriú go bhfuil sé nó sí tiomanta mar is cuí do mhúinteoireacht agus foghlaim ardchaighdeáin; agus
- a léiriú gur féidir leis nó léi oibriú go neamhspleách mar mhúinteoir cáilithe atá cláraithe go hiomlán.



Coinníonn an múinteoir nua-cháilithe an fhoirm go dtí go bhfuil an tréimhse iomlán de chleachtadh gairmiúil a bhfuil gá léi tugtha chun críche aige nó aici. Cinneann an Chomhairle Mhúinteoireachta cibé acu ar chóir nó nár chóir coinníoll *Droichead* a bhaint de chlárú an mhúinteora ar bhonn na foirme a chuirtear faoina bráid.

Clár píolótach *Droichead*

Tá fáilte roimh scoileanna ar mhian leo páirt a ghlacadh i gclár píolótach roghnach *Droichead*. Faoi láthair, tá an clár píolótach dírithe ar bhunscoileanna agus iar-bhunscoileanna sna contaetha ina mbíonn an líon is airde de mhúinteoirí nua-cháilithe de ghnáth. Tá liosta na gcontaetha sin ar fáil in *Droichead: Treoir le haghaidh Scoileanna Píolótacha* ar shuíomh gréasáin na Comhairle, www.teachingcouncil.ie. Is féidir le scoileanna nach bhfuil suite sna contaetha sin iarratas a dhéanamh chun páirt a ghlacadh sa chlár píolótach, mar atá déanta ag roinnt scoileanna cheana féin.

I gcás go roghnaíonn scoil páirt a ghlacadh sa chlár píolótach, tugtar cuireadh di bheith ina ball de chnuasach scoileanna atá suite sa réigiún céanna. Eagraítear cruinnithe cnuasaigh ag a gcuirtear oiliúint ar scoileanna rannpháirteacha, ag a roinneann siad a gcuid eispéireas i dtaca leis an gclár píolótach agus ag a bhfaigheann siad tacaíocht ón gClár Náisiúnta Ionductúcháin do Mhúinteoirí (CNIM) agus ó chigire atá sannta don chnuasach sin. Cuireann CNIM agus an Chigireacht tacaíocht leanúnach ríomhphoist agus ghutháin ar fáil.

Tá taighde á dhéanamh chun an tsamhail nua a mheas agus chun fianaise a bhailiú ón ngairm d'fhonn treoir a thabhairt do chur chuige na Comhairle maidir le forbairt agus cur i bhfeidhm *Droichead* amach anseo. Cuirtear sparánacht taighde ar fáil do scoileanna a ghlacann páirt sa chlár píolótach chun tacú lena ról sa snáithe taighde.



Is féidir tuilleadh faisnéise a fháil
ar an gcuid den suíomh gréasáin
www.teachingcouncil.ie
a bhaineann le *Droichead*.

**An Chomhairle Mhúinteoireachta
The Teaching Council**

Bloc A, Campas Gnó Mhaigh Nuad,
Maigh Nuad, Co. Chill Dara, Éire

Íosghlao 1890 224 224
Uimh. Ghutháin +353 1 651 7900
Uimh. Facs +353 1 651 7901
Ríomhphost info@teachingcouncil.ie

www.teachingcouncil.ie



An Chomhairle Mhúinteoireachta
The Teaching Council